



აკადემიური საბჭოს
დადგენილება № 06-01/11

„საჯარო სამართლის იურიდიული პირი – ბათუმის შოთა რუსთაველის სახელმწიფო უნივერსიტეტის მიზნობრივი სამეცნიერო-კვლევითი პროექტის შესარჩევი კონკურსის დებულების დამტკიცების შესახებ“ ბსუ-ს აკადემიური საბჭოს 2016 წლის 09 ივნისის N36 დადგენილებაში ცვლილებების შეტანის თაობაზე

„უმაღლესი განათლების შესახებ“ საქართველოს კანონის 21-ე მუხლის პირველი პუნქტის, ბსუ-ს წესდების მე-8 მუხლის, რექტორის მოადგილის სამსახურებრივი ბარათის (MES 6 24 0000094273, 31.01.2024), აკადემიური საბჭოს რეგლამენტისა და 2024 წლის 01 თებერვლის №06-02/03 ოქმის საფუძველზე, აკადემიურმა საბჭომ

და ა დ გ ი ნ ა:

1. „საჯარო სამართლის იურიდიული პირი – ბათუმის შოთა რუსთაველის სახელმწიფო უნივერსიტეტის მიზნობრივი სამეცნიერო-კვლევითი პროექტის შესარჩევი კონკურსის დებულების დამტკიცების შესახებ“ ბსუ-ს აკადემიური საბჭოს 2016 წლის 09 ივნისის N36 დადგენილებაში შევიდეს ცვლილებები, კერძოდ, დადგენილებით დამტკიცებული დებულების (N1 დანართის):

ა) მე-3 მუხლის მე-3 პუნქტი ჩამოყალიბდეს შემდეგი რედაქციით:

„3. კონკურსში მონაწილეობის მსურველი ვალდებულია წარმოადგინოს კონკურსის გამოცხადების შესახებ ბსუ-ს რექტორის ბრძანებით დამტკიცებული ფორმების და ფორმატის (მატერიალური ან/და ელექტრონული სახით) შესაბამისად:

ა) საპროექტო განაცხადი;

ბ) სამეცნიერო-კვლევითი პროექტის აღწერილობა და გეგმა-გრაფიკი;

გ) მიზნობრივი პროექტების დაფინანსების საერთო ბიუჯეტი, თითოეული პროექტის დაფინანსების მინიმალური და მაქსიმალური ოდენობა, მათ შორის ახალგაზრდა მკვლევართათვის განსაზღვრული დაფინანსების მოცულობა;

დ) მიზნობრივ სამეცნიერო-კვლევით პროექტში მონაწილეობაზე თანხმობის წერილი;

ე) პროექტის მონაწილეთა (პერსონალის) CV-ები;

ვ) ცნობა ბსუ-ს სტუდენტის სტატუსის შესახებ და სასწავლო ბარათი (პროექტში ჩართული ბსუ-ს სტუდენტისათვის).“

ბ) მე-3 მუხლის მე-3 პუნქტის შემდეგ დაემატოს შემდეგი რედაქციის 3¹ პუნქტი:

„3¹. ბსუ-ს მიზნობრივი სამეცნიერო-კვლევითი პროექტის აღწერილობაში მიეთითება:

ა) პროექტის სახელწოდება;

ბ) პროექტის ხანგრძლივობა;

გ) **კვლევის სიახლე და აქტუალურობა** - პროექტით გათვალისწინებული კვლევის თემის/საკითხის მიმოხილვა, აღწერა, აქტუალურობისა და მეცნიერული სიახლის დასაბუთება (სიტყვების მაქსიმალური რაოდენობა - 600).

დ) **კვლევის მიზნები, ამოცანები და კვლევის მეთოდოლოგია** - კვლევის მიზნებისა და ამოცანების ფორმულირება, კვლევის მეთოდების აღწერა, კვლევის მეთოდოლოგიის დასაბუთება (სიტყვების მაქსიმალური რაოდენობა - 400).

ე) **კვლევის შედეგები და განვითარების პერსპექტივა** - კვლევის მოსალოდნელი შედეგების ფორმულირება; კვლევის განვითარების შესაძლებლობა გრძელვადიან პერსპექტივაში (სიტყვების მაქსიმალური რაოდენობა - 400).

გ) მე-4 მუხლის პირველი პუნქტის „ა“ ქვეპუნქტი ჩამოყალიბდეს შემდეგი რედაქციით:

„ა) პროექტის ხელმძღვანელი (მენეჯერი) უნდა იყოს დოქტორის ან მასთან გათანაბრებული აკადემიური ხარისხის მქონე, ბსუ-ს აფილირებული აკადემიური ან სამეცნიერო თანამდებობის პირი ან ბსუ-ს ემერიტუსი, რომელიც კოორდინაციას გაუწევს პროექტის შედგენას, პროექტით გათვალისწინებულ კვლევას და პასუხისმგებელი იქნება პროექტის სამეცნიერო შედეგებზე, პროექტით გათვალისწინებული საქმიანობის ანგარიშგებაზე, პროექტის ეფექტურ მართვაზე და ადმინისტრირებაზე. პროექტის ხელმძღვანელი (მენეჯერი) შეიძლება იყოს **ახალგაზრდა მკვლევარი** (პირი, რომელსაც დოქტორის აკადემიური ხარისხი მიენიჭა კონკურსის გამოცხადების თარიღიდან ბოლო შვიდი წლის პერიოდში და მუშაობს უნივერსიტეტში);“;

დ) მე-5 მუხლის მე-3 პუნქტის „ბ“ ქვეპუნქტი ჩამოყალიბდეს შემდეგი რედაქციით:

„ბ) რომელსაც ბოლო **3 წლის** განმავლობაში აქვს საერთო პუბლიკაცია კონკურსსთან ან პირი, რომელიც ბოლო **3 წლის** განმავლობაში კონკურსსთან ერთად მონაწილეობდა სამეცნიერო-კვლევით პროექტში;“

ე) მე-6 მუხლის მე-3 პუნქტი ჩამოყალიბდეს შემდეგი რედაქციით:

„3. კომისიის სხდომა უფლებამოსილია თუ მას ესწრება სიითი შემადგენლობის ნახევარზე მეტი. კომისიის გადაწყვეტილებით შესაძლებელია სხდომები გაიმართოს, როგორც პირისპირ, ასევე შერეული ფორმატით ან დისტანციურად.“;

ვ) მე-6 მუხლის 5¹ პუნქტი ჩამოყალიბდეს შემდეგი რედაქციით:

„5¹. კომისია ვალდებულია გამარჯვებული პროექტის გამოვლენამდე, ამ მუხლის მე-5 პუნქტით გათვალისწინებული კრიტერიუმების შესაბამისად შეფასებული პროექტების ხელმძღვანელები მოიწვიოს სხდომაზე, მათი ხელმძღვანელობით წარმოდგენილი პროექტის პრეზენტაციის წარმოსადგენად, კომისიის წევრების შეკითხვებზე პასუხის გასაცემად, ასევე განუსაზღვროს მათ ვადა ტექნიკური ხარვეზის აღმოსაფხვრელად (მაგ: ბიუჯეტის გამოთვლით ნაწილში ან სხვა, არაარსებითი ხარვეზი).“;

ზ) მე-7 მუხლის მე-3 პუნქტის ჩამოყალიბდეს შემდეგი რედაქციით:

„3. პროექტის ხელმძღვანელი (მენეჯერი) ვალდებულია პროექტის დასრულებიდან ერთი წლის განმავლობაში უზრუნველყოს დასრულებული პროექტის შედეგების გამოქვეყნება Web of Science, Scopus ან Erih Plus (ჰუმანიტარული მიმართულებით) მეტრიკულ ბაზებში ინდექსირებულ სამეცნიერო ჟურნალებში (პუბლიკაციის გამოქვეყნებისას მითითებული უნდა იყოს, რომ პროექტი/კვლევა დაფინანსდა ბსუ-ს მიერ).“;

თ) მე-7 მუხლის მე-3¹ პუნქტი ჩამოყალიბდეს შემდეგი რედაქციით:

„3¹. პროექტის დასრულებიდან ერთი წლის შემდეგ გამოქვეყნებული სტატიის შესახებ წერილობითი ინფორმაცია პროექტის ხელმძღვანელმა პროექტის დასრულებიდან არაუგვიანეს ერთი წლისა უნდა წარუდგინოს რექტორს. აღნიშნული ინფორმაცია და მასალები განსახილველად გადაეცემა ბსუ-ს აკადემიურ საბჭოს.“;

ი) მე-7 მუხლის მე-5 პუნქტის შემდეგ დაემატოს შემდეგი რედაქციის მე-6 პუნქტი:

„6. წინამდებარე მუხლის მოთხოვნათა დაცვით საერთაშორისო რეცენზირებად/რეფერირებად ჟურნალებში ბსუ-ს მიზნობრივი პროექტთან დაკავშირებით სტატიის გამოქვეყნების თაობაზე წარმოდგენილი ანგარიშების და წერილობითი ინფორმაციის (მონიტორინგის შედეგების შესახებ სამსახურებრივი ბარათის) საფუძველზე ბსუ-ს აკადემიურმა საბჭომ შესაძლებელია მიიღოს გადაწყვეტილება პროექტის სამეცნიერო ხელმძღვანელის მიერ ამ პროექტის ფარგლებში მიღებული შრომის ანაზღაურების სრულად ან ნაწილობრივ დაბრუნების თაობაზე ან/და მომდევნო 1 ან 2 წლის განმავლობაში ბსუ-ს სამართლებრივი აქტებით მისაღები შეღავათების გაცემაზე შეზღუდვის შესახებ (პროფესიული განვითარების ღონისძიება ან სტატიის გამოქვეყნებაზე წახალისების ღონისძიება და სხვა).“;

კ) მე-8 მუხლის პირველი პუნქტი ჩამოყალიბდეს შემდეგი რედაქციით:

„1. სამეცნიერო-კვლევითი პროექტის განხორციელების მაქსიმალური ვადა არის 2 წელი. წინამდებარე მუხლის მე-8 პუნქტით გათვალისწინებულ შემთხვევებში (ფორსმაჟორი) პროექტის ვადის გაგრძელების შესახებ გადაწყვეტილებას იღებს აკადემიური საბჭო.“;

ლ) მე-8 მუხლის მე-6 პუნქტის „გ“ ქვეპუნქტი ჩამოყალიბდეს შემდეგი რედაქციით:

„გ) მხოლოდ პროექტის ხარჯთაღრიცხვაში პროექტის საერთო ბიუჯეტის არაუმეტეს 15%-ის ფარგლებში ცვლილების შემთხვევაში - რექტორთან შეთანხმებით გამოცემული ადმინისტრაციის ხელმძღვანელის ბრძანებით.“;

მ) მე-8 მუხლის შემდეგ დაემატოს მე-9 მუხლი და ჩამოყალიბდეს შემდეგი რედაქციით:

„მუხლი 9. გარდამავალი დებულებები

აკადემიური საბჭოს დადგენილებით დასაშვებია 2024 წლის განმავლობაში გაგრძელდეს 2023 წელს განსახორციელებელი მიზნობრივი საუნივერსიტეტო პროექტის განხორციელება, პროექტის განახლებული ბიუჯეტის (დარჩენილი/გაუხარჯავი ნაშთის) და პროექტის განახლებული გეგმა-გრაფიკის შესაბამისად, პროექტების ხელმძღვანელის

და ბსუ-ს შესაბამისი სტრუქტურული ერთეულის დასაბუთებული სამსახურებრივი ბარათის გათვალისწინებით და ადმინისტრაციის ხელმძღვანელის თანხმობით.“

ნ) ძალადაკარგულად იქნეს ცნობილი (ამოღებული იქნეს) ბსუ-ს მიზნობრივი სამეცნიერო-კვლევითი პროექტისშესარჩევი კონკურსის დებულების N1-4 დანართები და ჩამოყალიბდეს ახალი რედაქციები ბსუ-ს რექტორის ბრძანებით (ვიზირებული ადმინისტრაციის ხელმძღვანელის მიერ).

2. დადგენილება და კოდიფიცირებული ბსუ-ს მიზნობრივი სამეცნიერო-კვლევითი პროექტისშესარჩევი კონკურსის დებულება განთავსდეს ბსუ-ს ვებგვერდზე.

3. დადგენილება დაეგზავნოს ბსუ-ს მართვის ორგანოებს, რექტორის მოადგილეებს, სამეცნიერო კვლევების სამსახურს, საფინანსო-ეკონომიკურ დეპარტამენტს, იურიდიულ დეპარტამენტს, ფაკულტეტებს, დამოუკიდებელ სამეცნიერო-კვლევით ინსტიტუტებს, საინფორმაციო ტექნოლოგიების სამსახურს, იურიდიულ დეპარტამენტს, საქმისწარმოების სამსახურს (კანცელარი).

4. დადგენილება ძალაშია ხელმოწერისთანავე.

5. დადგენილება შეიძლება გასაჩივრდეს კანონმდებლობით დადგენილი წესით და ვადაში ბათუმის საქალაქო სასამართლოში (მისამართი: ქ. ბათუმი, ს. ზუბალაშვილის ქ. N30).

აკადემიური საბჭოს თავმჯდომარე,
რექტორი, პროფესორი

მერაბ ხალვაში